

Timmersoqatigiit Kattuffiata meeqqanut isiginnittariaasia

ATAATSIMOORFIMMI MEEQQAT TAMARMIK PINGAARUTEQARPOT, SUNNGIFFIMMI TOQQISSISIMANARTUMIK PEQQINNARTUMILLU SAMMISAQARSINNAATITAALLUTIK

NALIGIIMMIK PINNINNEQ AKUERINNINNERLU

Naligiinnerup akuerinninnerlu imatut isumaqartippagut:

- Meeqqat tamarmik assigiimmik periarfissaqassapput
- Meeraq ataasiinnaq salliutinneqassanngilaq
- Sungiusaasut kajumissutsiminnillu suliaqartut tamarmik meeqqat timersuummik soqutigisaqartut timersornikkut peqateqar-nissaannik pitsaasumik qulak-keerinnissapput.

AKUULERSITSINEQ PEQATAATITSINERLU

Akuulersitsinermi peqataatitsinermilu ukua pingaartippagut:

- Meeraq itigartinneqaraniluunniit mattunneqassanngilaq
- Meeqqat tamarmik tikilluaqqusaasutut toqqissisimasutullu misigiffiginnaasaannik killissaliussisoqassaaq
- Sungiusaasut kajumissutsiminnillu suliaqartut eqqaamassavaat meeqqat nakkutigissallugit, aperisassallugit tusarnaartassallugillu, ass. taakkunanga isummanik siunnersuutinillu tunineqartassallutik
- Meeqqat sungiusarnermi peqataatinneqassapput ikiortitullu suliaqartitaalersinnaassallutik
- Sungiusaasutut kajumissutsimilluunniit suliaqartut meeqqanik ilisimannilernissaat taakkunungalu soqutiginnivimmik takutitsinissaat pingaaruteqarput.

ILLERSUINEQ INERIARTORTITSINERLU

Illersorneqarneq ineriartornerlu isumaqarpoq meeqqat toqqissimanermik misigissasut, ineriartornerminnillu ikorfartorneqassasut. Imatut isumaqarluni:

- Meeqqanik sullitaqartunut tamanut meeqqanik pinerliisimanninnermut uppersaatinik aallertoqassaaq.
- Meeraq kinaluunniit timersornikkut peqatigiinnermi sumiginnagaanermik, kanngunarsagaanermik nakuuserfigineqarnermillu misigisaqqaqusaanngilaq
- Sungiusaasut kajumissutsiminnilluunniit suliaqartut meeqqap atugarliorneranik – matumani sumiginnagaaneq, kanngunarsagaaneq nakuuserfigineqarnerlu ilanngullugit – pasitsaasaqarunik ilisimannikkunilluunniit siulersuisunut ilisimatitsissapput.
- Meeqqat nalornissutigissanngilaat illit sungiusaasutut kajumissutsinnilluunniit suliaqartut timersornikkut peqatigiinnermut akisussaasuusutit
- Sungiusarnermi meeqqap ineriartornerata killiffia aallaavigineqassaaq
- Sungiusarnermi pinnguarneq aalanerlu pingaarnerpaassapput.

MEEQQAP PISINNAATITAAFFIANIK ILISIMASAQARNEQ

Meeqqap pisinnaatitaaffii aallaavigalugit ingerlatsivugut.

Timersornerup peqatigiiffullu silarsuaa timersorneriinnaanani annertuneruvoq. Tassani meeqqap pisinnaatitaaffini ilisimalersarpai aammalu misilittagaqalertarluni unammilligassat aqussinnaalertarlugit ataatsimoornernullu ilanngussinnaalertarluni.

Anguniagarput tassaavoq:

- Meeqqat inersimasullu tamarmik timersornerup silarsuaani ilisimassavaat timersornikkut ataatsimoonerit tamarmik meeqqat pisinnaatitaaffiinnik tunngaveqartut.

